



16. oktober 2019

UKA 2019/138
Aqqalu C.Jerimiassen

Kinguaassiutitigut meeqqanik atonerluisoqarsimatillugu pineqaatissiisarnerup sakkortusinissaanik Nunatsinni unnerluussisussaataasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Sofia Geisler, Inuit Ataqtigiit)

Sumiginnaaneq tamatta akisussaaffigaarput, uanga ilissilu tamassi maaniittusi. Kialluunniit inuup iluamik eqqarsarsinnaasup meerannguanik minguitsunik pisuussuteqanngilluinnartunik atonerluineq akuersaarsinnaanngilluinarpa. Meerannguaq imminut illersorsinnaanngitsoq inersimasumit kanngutsaatsuliorfiginninnera inuunerata minguitsup kusanaallisarneqarneranik aserorterneqarneranik naleqarpoq.

Soorliuna taamaaliortoqartartoq? Inuup inunnguusaaneereernerpa meeqqanik atoqateqarusuttarnermik perusussuseqartarnek? Imaluunniit inuup atonerluisimasup inuunermini aqqusaangarisarsimasai piusimanerpat? Apeqquterpassuit taamaattut pinngoralersarput inuiaqatigiisugut akorngatsinni ajornartorsiutit eqqartorneqalersillugit. Aap, ilumullimi kamannarujussuartaqaaq inersimasorsuit meerannguanut kanngutsaatsuliornermik iliuuseqarsimatillugit, namminerlu angajoqqaatut eqqarsartaasera atulassaagukku takorlooriarsinnaanngilaraluunnit taamak ittumik misigisaqaralaruma misigissuseq kamak suna pigissagaluarnerlugu inummut taamak meeqqamut iliortumut.

Pineqaatisseeriaatsit tusarlugit ilaatigut tupannaaluttaqaaq atonerluisimasunut, tassami siorna tusarparput atonerluisimasoq ukiumi ataatsimi pineqaatissinneqartoq. Tamanna pissusissamisoernerpa? Imaluunniit sunaana toqqammavimusimasormita? Uanga maanngaanniik nammineq eqqartuussisuusaarusunngilanga inatsisit ataanni illersungaalluta inuungatta tamatta. Qanorliuna taava erseqqissumik aaliangersagaliorsinnaalerniartugut pineqaatissisarnerit eqqarsaatigalugit? Naassaanngitsumut pillarniapagut? Ajornanngeqaaq taamak oqassalluni, tassami ilaatigut qineqqusaartuniik tusartareerpagut pineqaatissiisarnerit inoqatinut samminerusunngorsarniarneqarnerini partiit ilaannit sakkortuupilussuarmik ajorineqartarneri.

Taamaattorli ugguuna siunnersuuteqartoq Sofia Geisler isumaqatigisinnaavara, kinguaassiutitigut meeqqanik atonerluisimasut pineqaatissinneqartarnerannut aqqissuussisariaqarujussuarpugut pitsaanerusunik. Inoqateqarpugut ullumikkut taamatut meeraanermi nalaataqarsimasorpassuarnik, qujanaqisumilli ullutsinni inuit ammaneruleriartornerata ilutigisaanik inuttut katsorsartinnerit nassueruteqarsinnaanerillu paquminartuusimagaluaqisut illikartikkiartuarneqarput, tassuunakkut alloriarnerit siulliit inuiaqatigiittut tigusimalerpagut, immaqa ilaatigut inuup inuunerata maanaanaq



kipitinneqarinnaagaluarneranik kinguneqarsimasinnaangaluit suliarineqarnermikkut inuunerat ingerlaqqissinaalersimalluni.

Atassummiik taamatut oqaaseqarluta siunnersuut taperserparput ataatsimiitsitaliamilu suliarilluarneqarnissaa innersuullugu.